



Sud Bosne i Hercegovine
Суд Босне и Херцеговине

Broj: **S1 3 Iž 044967 23 Iž**
Sarajevo, 08.02.2023. godine

Sud Bosne i Hercegovine u Sarajevu, u apelacionom vijeću sastavljenom od sudija Mirsade Džindo kao predsjednika vijeća, Zvezdane Antonović i Redžiba Begića kao članova vijeća, odlučujući o žalbi Zlatana Begića iz T., ulica ..., izjavljenoj protiv Odluke Centralne izborne komisije Bosne i Hercegovine, broj: 06-1-07-29/23 od 02.02.2023.godine, u nejavnoj sjednici, održanoj dana 08.02.2023.godine, donio je

R J E Š E N J E

Žalba se odbija.

O b r a z l o ž e n j e

Odlukom Centralne izborne komisije Bosne i Hercegovine, broj: 06-1-07-29/23 od 02.02.2023 (u daljem tekstu CIK BiH), odbijena je ovjera Zlatana Begića, kandidata grupe delegata u Domu naroda Parlamenta Federacije Bosne i Hercegovine iz Kluba Ostalih, za izbor predsjednika i potpredsjednika Federacije Bosne i Hercegovine iz reda Ostalih.

Protiv navedene odluke žalbu je izjavio Zlatan Begić zbog bitne povrede odredaba postupka, pogrešno i nepotpuno utvrđenog činjeničnog stanja i pogrešene primjene materijalnog prava, sa prijedlogom da Apelacioni odjel Suda BiH istu usvoji poništi rješenje i predmet vrati na ponovno odlučivanje nadležnom organu-CIK BiH ili da u meritumu odluči na način koji bi omogućio kandidaturu žalitelju za izbor na funkciju predsjednika/potpredsjednika Federacije BiH iz reda Ostalih u skladu sa Ustavom Bosne i Hercegovine, te u skladu sa odredbama Evropske konvencije i njenih protokola relevantnih u ovome predmetu. Smatra da je CIK BiH jedino tačno utvrdila da je kandidat Zlatan Begić kandidovan iz reda Ostalih i da ga je kandidovala grupa delegata iz Doma naroda Parlamenta Federacije BiH iz Kluba Ostalih. Zanemarena je u potpunosti činjenica da je kandidovan građanin Bosne i Hercegovine koji po Ustavu BiH mora imati jednaka prava kao i svaki drugi građanin bez obzira na njegovu etničku i nacionalnu pripadnost. Pobijanom odlukom CIK BiH prekršene su odredbe Ustava BiH i Evropske konvencije, naročito odredbe člana 1. Protokola 12 uz Evropsku konvenciju, zatim član 3 Evropske konvencije za zaštitu ljudskih prava i temeljnih sloboda. Zanemarene su presude i praksa Evropskog suda

za ljudska prava u predmetima Sejdić-Finci protiv BiH, Zornić protiv BiH, Šlaku protiv BiH itd.

Centralna izborna komisija Bosne i Hercegovine je u odgovoru na žalbu je predložila da Sud žalbu odbije kao neosnovanu, ističući da je pobijana odluka pravilna i zakonita.

Žalba nije osnovana.

Iz stanja spisa proizlazi da je pobijanom odlukom CIK BiH odbijena ovjera Zlatana Begića, kandidata grupe delegata u Domu naroda Parlamenta Federacije Bosne i Hercegovine iz Kluba Ostalih, za izbor predsjednika i potpredsjednika Federacije Bosne i Hercegovine iz reda Ostalih, iz razloga što isti ne ispunjava uslove iz člana 9.13 Izbornog zakona BiH.

Odredbom člana 9.13 Izbornog zakona BiH („Službeni glasnik BiH“ broj 23/01-67/22) odnosno članom 2. Glave IV.B Ustava Federacije Bosne i Hercegovine, koji je amandmanom CXX na Ustav Federacije Bosne i Hercegovine nametnuo svojom Odlukom od 02.10.2022. godine Visoki predsjednik za Bosnu i Hercegovinu propisano je da:

(1) Bilo koja grupa od jedanaest delegata iz svakog od klubova konstitutivnih naroda u Domu naroda može predložiti kandidata iz reda odgovarajućeg konstitutivnog naroda. Svi kandidati mogu biti izabrani u skladu sa članovima 9.15 do 9.19 ovog Zakona ili na mjesto predsjednika ili na mjesto potpredsjednika Federacije.

(2) Ukoliko u roku od 30 dana od dana potvrđivanja rezultata za izbor delegata u Domu naroda potreban broj delegata u jednom ili više klubova konstitutivnih naroda ne predloži kandidata za mjesto predsjednika i dva potpredsjednika Federacije u skladu sa stavom (1) ovog člana, onda će to učiniti bilo koja grupa od sedam delegata iz kluba ili klubova konstitutivnih naroda u Domu naroda koji kandidate nisu predložili.

(3) Ukoliko u roku od 50 dana od dana potvrđivanja rezultata za izbor delegata u Domu naroda, potreban broj delegata u jednom ili više klubova konstitutivnih naroda ne predloži kandidata za mjesto predsjednika i dva potpredsjednika Federacije u skladu sa stavom (1) i (2) ovog člana, onda će to učiniti bilo koja grupa od četiri delegata iz kluba ili klubova konstitutivnih naroda u Domu naroda koji kandidate nisu predložili.

Neosnovano se žalbom ukazuje da su pobijanom odlukom CIK BiH prekršene odredbe Ustava BiH i Evropske konvencije, naročito odredbe člana 1. Protokola 12 uz Evropsku konvenciju, zatim član 3 Evropske konvencije za zaštitu ljudskih prava i temeljnih sloboda, kao i da su zanemarene presude Evropskog suda za ljudska prava u predmetima Sejdić-Finci protiv BiH, Zornić protiv BiH, Šlaku protiv BiH itd.

Imajući u vidu navedno, apelaciono vijeće zaključuje da je CIK BiH donoseći pobijanu odluku pravilno tumačila odredbu člana 9.13 Izbornog zakona BiH, iz razloga što delegati iz Kluba Ostalih u Domu Naroda Parlamenta Federacije BiH nemaju zakonsko uporište da budu kandidati ili da predlažu kandidate za predsjednika i potpredsjednika Federacije BiH.

Prijedlog kandidature Zlatana Begića je odbijen zato što je imao samo tri potpisa podrške grupe delegata iz Kluba Ostalih, što nije dovoljno bez obzira o kojim rokovima se radi, niti je u skladu sa odredbama Izbornog zakona BiH. Kandidati i predlagači kandidata na navedenu funkciju u skladu sa odredbama Izbornog zakona BiH i Amandmanom CXX na Ustav Federacije BiH mogu biti samo delegati iz klubova konstitutivnih naroda (Bošnjaka, Srba i Hrvata) Doma Naroda Parlamenta Federacije BiH.

Naime, Sud Bosne i Hercegovine naročito naglašava da nema ni ustavotvornu ni zakonodavnu nadležnost, pa ne može svojim djelovanjem zamijeniti institucije, najprije Parlamentarnu skupštinu Bosne i Hercegovine koja ima nadležnost da, u propisanoj proceduri, mijenja Ustav Bosne i Hercegovine ili zakone, odnosno da zamijeni institucije koje imaju obavezu preduzeti odgovarajuće mjere radi provođenja odluka Evropskog suda u pitanjima ostvarivanja aktivnog ili pasivnog biračkog prava.

Radi gore izloženog, apelaciono vijeće Suda Bosne i Hercegovine ocjenjuje da je pobijana odluka Centralne izborne komisije Bosne i Hercegovine pravilna i zakonita, a žalba neosnovana, pa je istu, primjenom člana 81. stav 1. Zakona o upravnim sporovima Bosne i Hercegovine („Službeni glasnik BiH“, broj: 19/02, 88/07, 83/08 i 74/10), valjalo odbiti.

**PREDSJEDNIK VIJEĆA
SUDIJA
Mirsada Džindo**